



- **Informaziuns dal consei pastoral** (sontada dai 30.08.2018):
la domegna ai 16 de setember gnará tigní **la festa dai iubilei da noza**. Cösc de é ponsé por i dé ai pers co vir te nosta ploania y co pó festejé eniann sü **25, 30, 35, 40, 45 y 50 agn de matrimone** la poscibilité da recordé deboriada söa noza te na santa messa de ringraziamont.
I iubilars co ô tó pert a cösta festa é bel peries da le lascé alessei a Veronica Ellecosta cina ai 5 de setember (☎ 348 6926843);
 le consei é a öna ch'al vegni tut sö en **assistent pastoral** por döta la Val Badia; al va debojügn da lascé dörteré i **tec dai ciampans** da Pliscia y da Curt; en domegna ai 14 d'otober gnará benedí ales 14:00 la **ciampana nea** dal ciüch d'Les Ciases.
- **Schira Jonila y Ministronc:** les mitans y mituns dla Schira Jonila y dal grup dai Ministronc é enviés a en **iade a Gardaland, en sabeda ai 22 de setember**. Dötes les enformaziuns é da ciafé sön plates motüdes fora sön chi picí altés.



enformaziuns y termins

70 agn KVV: por le iubileo de 70 agn K.V.W. vegnel fat festa a Weissenstein en sabeda ai 6 d'otober con na messa zelebrada da nosc vesco. Düc é bel enviés da tó pert a cösc pelegrinaje. Dala Val Badia vegnel organisé en bus co peia ia da Longega ales 08:15. Prenotaziuns tol sö Iaco Clement, ☎ 0471 839772 o 339 6257779.

Sera de informaziun: en jöbia ai 12 de setember, ales 20:00, ete da La Spona a Pederöa tignará le "Lebenshilfe" y le „AEB-Arbeitskreis Eltern Behinderter“ na sera de enformaziun sön ofertes por le tomp lede por porsones adultes cun debojügn partocialars tla Val Badia. La serada é ponsada por porsones atocades enteressades y por geniturs.

Ciasa de Palsa: l'aministrazion dla Ciasa de Palsa "Ojöp Frëinademetz" forma na gradatöra por ejams n'enciaria a tomp determiné desco **educadú/dessa sozial/a** (7^a ter cualifica funzionala). Condiziuns d'azés: diplom de maturité y laurea de pröm nivel por educadú profesional o diplom arjunt do na formaziun de trei agn, certificat de trilinguism B2 (ex nivel B). Al pó tó pert aspiranc/antes dal grup linguistisch ladin. Les domandes pó gní descariades jö dla plata internet www.ciasadepalsa.it y mess gní presentades te scretariat dla Ciasa de Palsa con düc i documonc, anter les 12:00 dai 21.09.2018. D'atres informaziuns é da ciafé te scretariat, ☎ 0474 524700.

Döt le bun a:	Rosa Angela Erlacher Frena, <i>San Laronz</i>	* 04.09.1932
	Angelo Taibon	* 04.09.1938
	Paola Teresa Obojes, <i>Al Plan</i>	* 05.09.1930
	y a düc chi co á santennom y complesc i agn cöst'edema	

Impressum: Ploania d'La Pli; redaziun Franz Rigo y Edith Willeit
Comunicaziuns cina le **dedemesaledema** sera a Franz Rigo: ☎ 0474 500978 o ✉ ploania@gmx.net
Download plata: www.unitepastorala.org



Tres la parora dla verité nes á le Pere scinché la vita y á fat fora de nos i pröms früc dla creaziun.

☞ Deut 4, 1–2.6–8 | Iaco 1, 17–18.21b–22.27 | Mc 7, 1–8.14–15.21–23

Dal Vangelo do San Merch:

Te chel tomp ¹êl i farisês y valgügn stüdiés dla lege gnüs da lerúsalem co se tigní sö pa Gejú. ²Ai odea che n valgügn de sü discepu mangiâ so pan con mans impures, chel ô dí nia laádes. ³I farisês, desco düc i atri iüdes, mangia pordert ma, sc'ai s'á laé denant les mans con na man plena d'ega, desco la tradiziun dai vedli le sciea dant. ⁴Ince canch'ai ven dal marcé ne mangai nia zonga se laé denant. Ciamó a n gröm d'atres prescriziuns se tegnî, desco laé jö i goti, i boché y les fanes. ⁵I farisês y i stüdiés dla lege l'á porchel damané: Ciodi ne se ten pa nia tū discepu ala tradiziun dai vedli, mo mangia so pan con mans impures? ⁶Al ti á rospognü: Le profet Isaiá â rajun con ci ch'al á dit porsora os falzuns: Cösc popul mo onoreia con i slef mo so cör é dalunc da me. ⁷Al n'é por nia desch'ai mo onoreia; ai enseña dotrines co é statuc de jont. ⁸Os trascoreis le comandamont de Dio y ves tignís ales tradiziuns dla jont. ¹⁴Spo ál endô cherdé la jont da d'el y á dit: Ascutédemo düc y capide ci ch'i ves diji: ¹⁵Nia ci che röa da defora ete tal chescian ne sciafia da le fá impur, mo ci co ven fora dal chescian, chel le fej impur. [...]

Oraziun dal de

*Periun! Dio onipotent, fontana de döt le ben, sonta ete te nosc cör l'amur a to ennom: lieiesse tres deplü a te ch'al cresci te nos ci co é bun y sant, ciara de nos y manten ci che t'as operé.
 Do cösc te periunse por nosc Signur Gejú Crist, to Fi, co é Dio y vir y regneia con te t'unité dal Spirit Sant por düc i secui dai secui. – Amen.*



☞ Letöres dla 23. domegna ia por l'ann:
Is 35, 4–7a | Iaco 2, 1–5 | Mc 7, 31–37

Edema liturgica dai 02.09. ai 09.09.2018

DOM 02.	22. domegna ia por l'ann dai Angeli Custodi <i>Ingrid, Zeno</i>
08:30 10 y 18	gran messa por dōta la ploania, devoziun a Santa Maria y benedisciun dal tomp <i>oferta por i debojügnis dla ploania</i> s.m. a Al Plan
Lön 03. 07:30	<i>Gregor le Gran, Sofia</i> s.m. a Al Plan
Ded 04. 07:30	<i>Irmgard, Ida, Iris, Rosalia</i> s.m. de rengraziamont dla fam. Porgan, Venezia s.m. por les Püres Armes
Dem 05. → 08:00 → 10:00	<i>Teresa da Calcuta, Rosvita</i> a Al Plan s.m. por le meterman dal ann de scora s.m. en onú dal Spirit Sant y de Santa Maria dal Bun Consei por le meterman dal ann de scora
Jöb 06. 19:30	<i>Magnus, Zacheus - de d'oraziun do vocaziuns</i> s.m. por † Maria Kehrler ved. Vollmann, Slugher s.m. por †† benefaturs de Sotru
Ven 07. ► 18:45 19:30	<i>pröm vendres - Judit, Otto, Regina</i> signor ploan va a proveder poscibilité da se pissié s.m. por na familia s.m. por prei vis y †† d'La Pli, funziun al Sacher Cör
Sab 08. 07:30 18:00	<i>fešta dal Nadé de Santa Maria, Adrian, Alan</i> s.m. de ringraziamont dles scincundes tla vita s.m. por †† Angela, Alberto y Maria Luisa s.m. prefestia a Al Plan
DOM 09.	23. domegna ia por l'ann <i>Pire Claver, Corbinian</i>
08:30 10:00	gran messa por dōta la ploania y benedisciun dal tomp <i>oferta por l'Istitut Vinzentinum</i> s.m. a Al Plan
ampola:	por la familia Rovara, Plans
ministronc:	► da doman y domegna: Elias Ellecosta y Matteo Willeit ► da sera y domegna: <i>Nadia y Roman Frontull</i>
i recordun:	Celestino Erardi, Al Plan + 05.09.2009



N comportamont zonza cör (Mc 7, 1-8.14-15.21-23)

I ponsi do

Gejú n'ô nia che jont co se comporta bun ma deforaia y se desmoncia i valurs co nasc dal cör: la misericordia, la pureza, l'onesté y la fraternité.

Ince nos messun meter averda ch'i ne tomunse nia te cösc comportamont: lascé odei na bela cherianza mo ester mariziusc daete; respeté les regoles mo con degüna convinziun y ligreza.

I preii ensciö

Gonot sunse te dlijia, preii y cianti con la bocia, mo mi ponsiers é sön plaza dai jüc o pal ultimo film ch'i á odü tla televijiun. Sc'i encunti compagns i salüdi da orei bun, con na bela cira, mo te mio cör i iudichei y i ponsi mal de ei. Pal sport, te scora, pla parontela y dant ai geniturs proi da mo comporté bun y da porté respet, mo nia dagnora ne „meti l'anima“ te ci ch'i feji. Empü farisei sunse düc, Signur, te cösta nosta sozieté co ti dá plü emportanza al'aparenza co al cör. Scinchesse töa odlada co va ete tal'anima y ti dá coerenza y sinzirité a nostes parores y a nostes operes.

Walter Cazzaniga, Parola amica - Il Vangelo della domenica per ragazzi



Domegna dai angeli custodi



L'angelo custode é la resposta de Chelbeldio a nosc dejier da avei zacai co nes mena y nes condüj adancuntra a nosc travert plü alt.

De söa esistenza nes cunta la Sacra Scritöra y söa presenza podunse tres endô sontí tla vita.

L'angelo custode ven dala santité de Chel Bel Dio y custodesc ci ch'i án de sant te nos. Tla meseria y tal prigo ne se láscel nia susc y met nosta vita tles mans de Chelbeldio.



Por le meterman dal ann de scora



L'emparé é bun por la vita, porchel vaighedela, os mituns y mitans, con ligreza y curiosité, con coraje y ardiment, con fortüna y sanité da pié ia endô a emparé y svilupé osc talent.

Idio ciari de os y ves benedesci sön üsc trus de scora y de vita. De cör les mius aodanzas a düc chi co peia ia y vá endô ala scolina, a scora y a stüdié!